



M. ANTONII MVRETI
ORATIONES TRES DE
STVDIIIS LITERARVM,
VENETIIS HABITAE.



VENETIIS, M. D. LV.

f. pautas Gallus Remsor

M. A. NTONII MURRI
 ORATIONES TRIS DE
 STUDIIS LITERARUM,
 VENETIIS HABITAE.



MDCCCXXXIII

M. ANTONIUS MURETVS
HIERONYMO FERRO,
PATRICIO VENETO, PATA-
VINI GYMNASII, IIII VIRO, NOB. MAGNOM
JAN. X. I. DE VIRO CLARISSIMO. S. D.



IV multumq; dubitavi, HIERONYME,
vir clarissime, deberemne, cum has qua-
lescunque orationes divulgare in animo ha-
berem, tibi eas potissimum inscribere. nam
cum mihi proponerem ante oculos summam
personæ tuæ dignitatem; vix videbar satis
modeste facturus, si rem tantulam in tuo
tanti viri nomine apparere vellem. rursum

cogitanti noctes & dies de plurimis tuis erga me, maximisq; benefi-
cijs, quidam interdum obijciebatur metus; ne forte, non tu quidem,
qui meum animura bene, ut opinor, perspectum habes, sed ceteri pa-
rum me gratum indicarent, si diutius distulisses aliquam grati erga
te animi significationem dare. nam si expectare vellem, dum aliquid
excuderem, quod vel dignitati tuæ responderet, vel beneficiorum, quæ
à te accepi, magnitudinem adequaret; vota mihi plane facienda erant,
ut usque ad illud tempus vitam producere liceret. est autem iniquum,
eo nihil reddere, quia plurimum debeas. simul putabam, tibi non inin-
cundum fore memoriam illius temporis, quo tua mihi singularis huma-
nitas summo & auxilio, & ornamento fuit. nam cum & nouitati à
non nullis, & peregrinitati inuideretur mea; tu vnus extitisti, qui
causam meam acerrime susciperes, qui eam collegis tuis, viris omni
laudum genere dignissimis, studiosissime commendares, qui auctori-
tatis tuæ pondere plurimorum animos ad me amandum, & aliquo in
numero habendum commoueres. Hæc me adduxerunt, ut satius du-
cerem, hoc pusillum testimonium dare obseruantia erga te mea; quam

in aliquam parum memoris animi suspensionem longiore silentio incur-
re. habeo autem in manibus cum alia quedam, cum Ioannis gramma-
tici commentarios in libros priorum analyticorum Aristotelis, quos ab
alijs miserrime ac foedissime deprauatos, emendare, & in Latinum ser-
monem conuertere molior. ij, ubi absoluti erunt, in tuo ipsi quoque no-
mine, si tu patieris, edentur. Vale. Venetijs, ad IX Kal.
Nouemb. M. D. LV.



ORATIO DE LAVDE LITERA-

RVM HABITA VENETIIS,

MENSE OCTOBRI,

ANNO M. D. LIV.



VAE singula hominibus ad
dicendum accedentibus timo
rem facere consueverunt, pa
tres amplissimi, vósq; ceteri
cives ornatissimi, ea mihi se
se hodierno die obijciunt vni
uersa. Siue enim loci amplitu-

do afferre perturbationis aliquid potest, Venetiis
dicimus: siue audientium dignitas, magna lectissi
morum hominum, adstante frequentia dicimus:
siue ipsa orationis materia, dicendiq; conditio, ita
dicimus, ut sit nobis eodem tempore de ingenio,
de doctrina, de gloria, ornamentisq; omnibus in
hoc literarum certamine periclitandum. Venetijs
dicere, si quisquam est, qui parum putet, eum ne
cesse est in maximarum, earundemq; toto orbe
notissimarum rerum ignoratione versari. Ecquis
enim est hodie tam inaccessus, tam ab omni homi
num consortio remotus in terris locus, quò non
huius praestantissimae ciuitatis fama peruasisset? quis
populus, quæ gens, quæ hominum natio vel tam

A

immanis

immanis atque barbara, vel tam exculta disciplinis
atque artibus, quam non iam pridem florentissima
Venetorum respublica non gloria modo, & splen-
dore nominis sui, verum etiam admiratione com-
pleuerit? Hæc vero firmamenta reipublicæ, hæc
ornamenta Italiæ, hæc virtutum omnium, laudan-
darumq; artium præclarissima lumina intuentem,
non commoueri, tantum id quidem est, vt, non
dicam in meam hanc mediocritatem ingenij, sed
vix in quenquam hominem, qui ceterorum de se
iudicia extimescat, cadere posse videatur. Ete-
nim si eloquentissimos olim viros accepimus, cum
ad dicendum venissent, vnius principis aspectu ita
conturbatos fuisse, vt obmutescerent; quid mihi
tandem animi esse oportet, qui neque comparan-
dus cum illis omnino sum, & apud vos dico, sena-
tores amplissimi, ad quos cum oculorum conuer-
to aciem, totidem mihi confessum principum vi-
deor intueri. Ac ceteri quidem sæpe ad eam excu-
sationem confugiunt, vt se, cum tenuitatis suæ con-
scii essent, tamen vel necessitate, vel officio impul-
sos, vel amicorum siue precibus, siue tempore ali-
quo adductos, dicendi munus non tam appetuif-
se, quam detrectare non potuisse dicant; quam to-
tam rationem nobis hodierno die ipsa rei natura
conditioq; præcludit. Non enim detrectantes, sed
vltro nobis deposcentes hanc dicendi prouinciam,
ad

ad eam non alienis precibus impulsus, sed vestra incredibili benignitate admisi sumus: ut si minus ex aliqua parte nostra vobis approbata fuerit industria, causa nulla sit, quin omnes accusandam potius nostram temeritatem, quam imbecillitatem subleuandam putent. Equidem cum & ab ineunte ætate, tum domesticis excitatus exemplis, tum ipsa hortante natura, honestarum artium studia coluerim, & ubi primum per ætatem licuit, quæ mihi meo ipse labore pepereram, aliis tradere ingressus, nouem propè iam annos in hac dicendi, ac docendi exercitatione consumpserim; tamen superiora illa considerans, ita commouebam animo, facile ut hoc potuerim abstinere consilio, nisi me huc summa de vestra singulari humanitate concepta spes, & magna quædam approbandæ vobis, si minus eruditionis, at certe voluntatis meæ cupiditas impulisset. Ac mihi quidem, & cuius rei causa in hunc locum ascenderim, & ad quos verba facturum sum, cogitanti, prorsus ita videtur; nullo in argumento meam commodius orationem posse versari, quàm si, literarum disciplina quantum non ornamenti solum, verum etiam prædij bene temperatis ciuitatibus afferat; tum adhibitis rationibus, tum etiam exemplis, atque ex veteribus seculis repetita memoria exponam: minime id quidem, quo vos, tales viros, commonefaciam, excellentibus

cellentibus à natura ingeniis præditos, eruditos à
studiis liberalium doctrinarum, à diuturno assi-
duoq; magnarum rerum usu peritos: sed quia li-
benter facio, ut, quarum artium percepta scientia
vnumquenque vestrum vehementer affici con-
stat, earum animos vestros iucunda commemo-
ratione delectem. Quæ cum ita se habeant; mihiq;
ipsa per se delecta ad dicendum materiæ dignitas
satis magnam audientiam factura videatur: tamen
magis consuetudine, quàm quòd ita necessarium
iudicem; petam à vobis, ut mihi res pulcherrimas
breui oratione comprehendere meditati, exigui
temporis attentionem ne denegetis. Magna o-
mnino vis, magnúmque momentum positum est in
literis, viri amplissimi, ad conseruandas, bonisq;
cumulandas omnibus ciuitates. Nam cum felicitas
publica, ad quam humana omnia referenda sunt,
è singulorum ciuium felicitate constet: singulo-
rum autem felicitas in excolenda, exercendaq; vir-
tute præcipue sita sit; & ad perfectam virtutem
consequendam, necessariam quandam præcurso-
nem adhibeant literæ: illud profecto consequitur,
ut, nisi in qua literarum cultura vigeat, florere ab-
solute ciuitas nulla possit. Ponite vobis ante ocu-
los, omnes ætatis humanæ partes: omnem publi-
corum temporum varietatem, omnes instituendæ
vitæ rationes & vias animo & cogitatione percur-
rite:

rite: nullam omnino reperietis, quæ non ita literarum auxilio indigeat, ut eas si quis sustulerit, solem ipsum de mundo sustulisse videatur. Eæ nos, ubi primum firmitus incedere, atque articulatus loqui cœpimus, de ipso prope nutricum acceptos sinu, titillatione quadam honestissimæ voluptatis alliciunt, allectos præceptis saluberrimis complent: non tantum bene dicendi, verum etiam bene vivendi, commonstrant vias: excitant in animis nostris igniculos gloriæ: quantus sit in virtute splendor, quanta in vitiis deformitas, edocent: quæ qui semel bene penitus imbiberint, ij nunquam non postea & vitij turpitudinem omni studio refugient, & officij honestatisq; rationem rebus alijs omnibus anteponent. Ut autem in semente posita spes messis est, ita totius reliquæ vitæ expectatio ab educatione pueritiæ pendet: Vbi vero infirmam illam ineuntis ætatulæ teneritatem vigor adolescentiæ excepit, quæ tandem alia res aut animum præclararum rerum studio accendere, aut efferentibus sese cupiditatibus, quibus ea pars insigniter agitari solet, frangere iniicere, præter literarum tractationem, potest? Themistoclem olim, cum somnum capere adolescens non posset, dicere solitum tradunt, se Miltiadis trophæo, quiescere volentem, excitari: quanto eos acius incendi, atque inflammari necesse est, qui quotidie non unius, sed innumerabilium

numerabilium hominum virtute præstantium tro-
phæa non è marmore constituta ad exigui prædi-
cationem temporis, sed ad omnem æternitatem
commendata literis intuentur? Neque vero perti-
mescendum est, ne aut labore frangantur, aut vo-
luptatis irretiantur illecebris ij, qui ætatis suæ flo-
rem literarum studiis dedicandum esse statuerunt.
Tanta siquidem est oblectatio paulatim acquiren-
da cognitione rerum sese pascentis animi, ut ea
qui fruuntur, ab iis neque laboris tædium, neque
auocantium voluptatum blanditiæ sentiantur. Ita-
que sapienter poetæ, cum ceteros omnis deos Ve-
neris imperio subdidissent, in Minervam modo &
in studiorum præsides Musas nihil ei, nihil Cupi-
dini iuris esse voluerunt. Quinetiam illud ab ijs-
dem memoriæ proditum est; Iasonem olim ceter-
osq; Argonautas, cum eam insulam, quæ ab amœ-
nitate, florûmq; copia nomen inuenerat, præter-
navigarent, periculûmq; esset; ne molli, ac deli-
cato Sirenû cantu, quæ eam insulam incolebant,
ad exitium perducerentur, vnum in Orphæo per-
fugium habuisse: qui cum assedisset in puppi, si-
mulq; fides blandis impellere digitis, simul vocem
illam, qua rupes nemorâq; traxerat, explicare cœ-
pisset, tanta simul aures animosq; audientium vo-
luptate compleuit, ut iam Sirenû vocibus nemo
navigantium moueretur. Hoc figmento, quid tan-
dem

dem aliud doctissimi homines, nisi id, quod nos volumus, indicarunt? Florida videlicet illa insula iuventus est. eam qui quasi præteruchuntur, magno in periculo sunt, ne Sirenum, id est, voluptatum blanditiis decépti, & à recto itinere abducti, in vada & scopulos deferantur. Quodnam igitur huic tanto periculo comparatum remedium est? quod, nisi Orphei, optimi ac sanctissimi vatis lyra? cuius suauitatem qui percipiunt, ij & Acheloidum cantus pro nihilo putant, & tandem institutum illud iter emensi, vellus aureum, id est, virtutem cum immortalī coniunctam gloria consequuntur. Nimirum vt maior lux minorem, ita minoris voluptatis sensum perceptio maioris extinguit. Quanto autem voluptas ea, quæ discendo sentitur, ceteris omnibus maior, sinceriorque sit, vel illud indicio est, quòd aliarum, etiam qui eis plurimum tribuunt, satietatem tamen quandam esse, ac tedium, confitentur; huius vt quisque percepit plurimum, ita eam acrius, atque audius concupiscit. Quod si cui forte dubium est, prodeat in medium Chrysippus, qui sæpe studio intentus tanta voluptate perfruebatur, vt eum velut extra se positum cibi potionisq; caperet obliuio. Prodeat solertissimus ille cœlestium orbium non per scrutator tantum, sed etiam imitator, Syracusanus Archimedes, qui non modo earum rerum quas natura

tura fert, præ ea, quam capiebat è studiis, oblatione memor non erat; sed in illa ipsa Syracusanæ vrbs direptione, ita defixus erat in studio, vt prius hostilis gladij cuspidem corpore exceperit; quàm vrbs in hostium potestatem venisse sentiret. O rem omnium seculorum admiratione dignissimam. Diripiebatur vrbs ea tempestate omnium opulentissima; effusi per vias milites, vt in quæquæ inciderant, sine vllò sexus, ætatis, ordinis discrimine obuios contrucidabant; vndique gladio-
rum fulgor præstringebat oculos, vndique armorum sonitus, vndique cadentium tectorum fragor audiebatur; puerorum eiulatibus, mulierum lamentis, morientium gemitibus, militum clamoribus; priuata publicaq; omnia circumsonabant; ipsa vrbs pene dimota & conuulsa sedibus suis, suorum ciuium in cæde ac sanguine natabat; cum vnus hominis mens in media ciuitate, ciuitatis ipsius casum ac ruinam non sentiebat. Te nimirum Archimedes incredibilis illa vis eximie voluptatis, quam haurit animus ex maximarum rerum scientia; humi stantem abripuerat; tuamq; mentem cum omni prorsus oculorum auriumq; sensu in illud ipsum cælum, illa ipsa, quæ intuebaris, astra sustulerat: itaque non tuus confosso corpore in cælum euolauit animus, sed cum eò iam antea euolasset, tum demum in illis beatissimis sibiq; notissimis sedibus
conquieuit.

conquieuit. Solonem vero accepimus, cum in lectulo, morti proximus, decumberet, inaudissetq; assidentes amicos, de re quapiam, summisse, ne ipsi molestiam parerent, disputantes, erecto, ut potuit, iam semimortuo capite, rogasse eos, ut aliquanto loquerentur elatius; sibi, si etiam moriens aliquid discere potuisset, discessum è vita iucundiores fore. O discendi cupiditas; quid non efficias, ubi semel generosa ingenia occupasti. Tenebatur homo sapientissimus grauissima vi morbi defixus in lecto: vicinitate iam mortis ab omnibus pene corporis partibus sensus abscesserat; beatus ille animus, mox liber ac solutus futurus, è corporeis vinculis exilire cupiebat; cum quicquid supererat virium, eò contulit, ut deficiente lingua, vocibusq; interruptis ac morientibus suum doctrinæ cognitionisq; desiderium indicaret. Quid hunc verisimile est firmum ac valentem fecisse; qui ne mori quidem, nisi discendo, voluerit? Merito igitur tandiu floruit Atheniensium respub. quandiu tam præclari viri tenuit disciplinam. Sed ut eò redeamus, unde nos facta præclarissimorum hominum mentio paulisper abduxit; dici profecto non potest, adulescentes nobilissimi: vos enim, vos meam compellabit oratio: dici, inquam, non potest, ea studia, quæ nunc toto pectore incumbitis, quanto olim vobis & ornamento, & auxilio futura

670V B sint,

sint, cum vos & generis vestri nobilitas, & vestra
virtus ad reip. gubernacula admouerit. Etenim
quibus artibus ciuitates præcipue conseruantur,
pietate, iustitia, fortitudine, in primisq; pruden-
tia, earum sunt omnium artium quasi semina lite-
rarum prodita monumentis. Neque vero hæc à
me ita disputantur, vt contendam, nisi literis eru-
ditum, ciuem patriæ utilem esse neminem posse:
sed hoc dico; nisi literis exculti sint ij, qui velut in
reip. puppi sedentes, clauum tenent, multis eos mû-
neris sui, iisq; præcipuis partibus necessario de-
futuros. Nam cum duo publicorum temporum ge-
nera sint, vnum pacis, alterum belli, quorum alte-
rum semper optabile est, alterum nunquam opta-
bile, non nunquam necessarium; quomodo, vt
hanc partem priore loco attingamus, in pace, ci-
uibus iura describere; quantum cuique tribuen-
dum sit, intelligere, ciuium inter se dissidia compo-
nere, verba publice facere, legationes cum laude
gerere, præterita tenere, futura prospicere, quid
in omnibus rebus factu optimum sit, videre, & ex
alijs alia colligere poterit, nisi qui hæc sibi, de litera-
rum fontibus haurienda omnia existimauerit? Nisi
vero eorum recipienda sententia est, qui fieri pu-
tant posse, vt qui reip. præest, quamuis literarum
sit expers, tamen ad eas res, quas modo enumera-
uimus, aliena opera non incommode vtatur. An

vero T. Manlium Torquatum, memoriae proditum est, cum consul declaratus fuisset, excusasse valetudinem oculorum, & summum imperium detrectasse; quod indignum duceret, ei capita ac fortunas ceterorum committi, qui alienis oculis omnia gerere cogeretur: qui alieno ingenio, alienaq; lingua ubique uti necesse habebunt, ij satis ad gubernandos ceteros idonei videbuntur? At oculorum quidem lumine carentes, nihil prohibet acie ingenij etiam futura cernere, optiméq; consulere: quales in fabulis Tiresiam, in historijs Appium legimus: cuius vero doctrinarum luce careat animus, quid is tandem gerere, quid suscipere, quid cogitare præclarum potest? Sed sunt quidam homines, qui cum literarum tractationem tranquillis pacatisq; temporibus & honestam in primis & utilem esse fateantur: iidem tamen, cum occupata bello aliquo ciuitas est, latere eas, veluti perterritas metu, & inter tubarum lituorumq; clangorem, nullum sui amplius præbere usum arbitrantur. Quorum nobis hac in parte coarguendus error est, & quantum vel in medio bellorum tumultu literæ valeant, aperiendum. Etenim si corporis tantum, non etiam animi, viribus bella gererentur, tum isti fortasse aliquid dicerent: nunc quis est, qui cum mihi & maximum esse in bellis consilio ac prudentiæ locum, & eas virtutes bona ex parte litera-

rum studio comparari, certe quidem insigniter au-
geri, confirmariq; concesserit, idem tamen earum
scientiam in bello inutilem esse contendat? An igno-
ramus celebre illud regum regis Agamemnonis vo-
tum, qui ut Troia facilius potiretur, non Achillis,
aut Aiakis, sed Nestoris decem similes optabat si-
bi? Neque temporis nobis ad viuendum à natura
præscripti ea longitudo est, neque ita fert humana-
rum rerum ratio, ut multis admodum bellis inter-
fuisse vnus idemq; possit: itaque qui vnum alte-
rúmve spectarunt, multum sibi militaris pruden-
tiæ collegisse existimantur. quid eos iudicabimus,
qui hoc sibi diuturna librorum euolutione pepere-
runt, ut omnibus, quotquot post hominum me-
moriæ gesta sunt, bellis interfuisse videantur?
Quod si quis ita bella aliquot spectare posset, ut
vtriusque partis consilia teneret, rerum admini-
strandarum viam rationemq; cognosceret, even-
tus animo cerneret, quid non ei postea in rebus
bellicis omnium consensu tribueretur? at hæc o-
mnia, qui versantur in literis, aliâq; plurima ac pul-
cherrima ociosi ac sedentes consequuntur. Taceo,
quàm multa expressa sint eruditissimorum homi-
num scriptis de virtute, de gloria, de caritate pa-
triæ, de animorum æternitate, de præmijs quæ
post mortem manent eos, qui se pro patria ani-
mose ac fortiter gesserint, quæ tantam vim habent,

vt neque qui ea ignorent, veræ laudis habere gustum, neque qui tractant, veræ ac solidæ gloriæ ullam omnino rem anteferre possint. Quid illud, an non quantiuis est, quod sæpe labantes iam ac deficientes exercitus eloquentum hominum voce legimus fuisse reuocatos? Citetur testis Lacedæmoniorum ciuitas, cuius exercitus Tyrtæi poetæ versibus inflamatus, pulcherrimam illam de Messenijs victoriam reportauit. Dies me deficiet, si aut eruditos homines, qui bellicis laudibus præstiterunt, aut fortissimos imperatores, qui eruditionis & doctrinæ gloria excelluerunt, enumerare institutam. Nam & Architam Tarentinum sexies exercitum duxisse comperimus, & Melissum naualibus aliquot victorijs insignem fuisse, & ter stipendia fecisse Socratem, & Platonem, & Xenophontem egregiam in bello ciuibz suis operam præstitisse. Quid illa propugnacula Græciæ; Periclem, Themistoclem, Epaminondam loquar? Quid illa Romani imperij columina, Scipiones, Lucullos, Fabios, Marcellos, aliósq; innumerabiles proferam? quos omnes cum bellicis laudibus claros, tum præstantes doctrinæ studijs fuisse, historiæ loquuntur. Nam Iulium Cæsarem, quis nescit, vtra laude præstaret, ambiguum posteris reliquisse? Brutus autem, quanto literarum ardore flagrauerit, vel ex eo colligi potest, quod ea ipsa nocte, quæ mortem
ipsum

ipſius antecēſit, Platonis dialogum de animorum
immortalitate legiſſe aliquoties dicitur. Atque hoc
præclare olim intellexiſſe videntur Mitylenæi, præ
cipuam eſſe in rep. vim literarum; qui, quos po
pulos bello deuicerant, nullam eis aliam pœnam
irrogabant, niſi vt ne liberos ſuos literas edocerent.
ſciebant videlicet eas tantum ciuitates florere poſ
ſe, in quibus literarum ſtudia colerentur. Cuius rei
cur tandem aliunde exempla repetamus? An vero,
ciues, quòd viget hodie veſtra rep.; quòd floret,
quòd beata eſt, quòd cum ceteræ orbis vniuerſæ
partes grauiffimis bellorum tempeſtatibus agiten
tur, vna hæc (quod ei deus opt. max. proprium ac
perpetuum faxit) in pace atque in ocio conquie
ſcit, aliunde id fieri creditis, quàm quòd ei & præ
ſunt homines cum ceteris omnibus, tum hac eru
ditionis & ſapientiæ laude clariſſimi, & ſemper eo
rum ſimillimi præfuerunt? O diuine Plato, tua ſunt
omnia & dicta & cogitata præclare. Tu dicere ſo
lebas, tunc demum rep. beatas fore, cum eas aut
philophi cœpiſſent regere, aut qui regerent, phi
loſophari. Tuum hoc ſapientiſſimum oraculum
perpetua iam mille amplius annorum felicitate Ve
netorum rep. comprobauit. Equidem quo lon
gius in altum inuehor, patres ampliſſimi, eo mihi
amplior & patentiſſe orationis veluti curſus oſten
ditur. ſed & temporis me ratio, & veſtra ſingula
ris

ris sapientia, ut vela contraham, portumque tandem aliquando respiciam, monet. Neque enim credibile est, posse aut me, aut quenquam de literarum præstantia, fructibusque qui ex earum tractatione capiuntur, vobiscum melius, aut copiosius, quam unumquemque vestrum secum loqui: & mihi non tam orationis conquirenda copia est, quam vestra satietas refugienda. Itaque finem dicendi faciam, si vos prius etiam atque etiam rogauero, ut si forte minus à me ornate ac copiose dictum est, quam & huius loci amplitudo, & summa audientium dignitas postulabat, meum tamen idcirco placendi vobis desiderium ne improbetis. Ego quidem si non indignus à vobis, qui sæpius audiar, iudicer, erit, quod mihi magnopere gratuler: sin forte: sed reprimam me: neque committam, ut meis ipse votis videar male ominari: qui tamen à tot, tam præclaris viris, tanta benignitate auditus fuerim, magnum mihi non huius modo laboris, sed totius ante actæ vitæ fructum hodierno die vestro singulari beneficio videor consecutus.

D · I · X · I.

ORATIO SECVNDA.



ANTA est collati à vobis in me beneficij magnitudo, patres amplissimi, vt mihi pro eo, sicuti par est, vobis gratias agere cupienti, non mediocris obijciatur metus, ne, cum omnes ingenij naei vires

ad gratam illius commemorationem contulero, mea tamen oratio longe multumq; à rei ad dicendum proposita dignitate abfuisse videatur. Etenim quid à me amplius, quid praeclarius, quid honorificentius vel sperari, vel, dicam etiam, optari poterat, quàm vt talium virorum iudicio, ad excolenda disciplinis liberalibus huius nobilissimae iuuentutis ingenia idoneus iudicaretur? An vero fortissimos olim viros accepimus in Olympicis certaminibus tanto studio, tanta laborum tolerantia, tanto denique vitae ipsius periculo solam vocem praconis & coronae testimonium petere solitos esse; earumq; rerum adeptione ita esse gauisos, vt eorum non nulli praehimnia laetitia in medijs gratulationum amplexibus expirasse dicantur: ego in florentissima omnium, quae sub caelo sunt, ciuitate, nobilissimorum hominum iudicia de me honorificentissima consecutus, aut mediocriter mihi gaudendum,

dendum, aut gaudium ea ex re meum tegendum
illo modo, ac dissimulandum putem? Nam illi
quidem, ut votorum compotes fierent, roboris
modo aut velocitatis laudem consequiebantur, qua-
rum utrarumque gloria clarissimos saepe numero vi-
ros à seruis & gladiatoribus superari videmus: mi-
hi vos, patres amplissimi, eorum quae vel praecipua,
vel sola etiam in hominibus bona sunt, probitatis
atque doctrinae testimonium praebuistis. Quae siue
in me talia sunt, qualia vos opinamini, faciendum
est mihi, ut haec vestra de me in dies duplicetur o-
pinio: siue, quod magis arbitror, eximia vos na-
turae vestrae bonitas, ut multo plus mihi, quam pro
meo merito, tribueretis, adduxit; omnibus & cor-
poris & animi nervis eniti debeo, ut quam expe-
ctationem in animis civium vestri de me iudicii au-
toritas excitavit, eius aliquam partem labore, di-
ligentia, assiduitate sustineam, rebusque ipsis co-
rum vanitatem coarguam, qui superioribus men-
sibus, quasi vestrae, si diis placet, prudentiae diffi-
dentes, ne munus hoc peregrinis hominibus com-
mitteretis, è superiore loco vos admonebant. Qui-
bus ego ita responsum volo, non ubi quisque na-
tus fuerit, sed quibus artibus studium suum dede-
rit, quantumque in ijs effecerit, in huiusmodi rebus
considerari oportere. Praeclare enim hoc philoso-
phi disputant, uniuersum hunc terrarum orbem

C

quasi

quali ciuitatem esse quandam, esseq; omneis inter
se homines ciuili quadam societate copulatos. quæ
qui tenent, ij & quoquò gentium venerint, nus-
quam sibi peregrini videntur, & ipsi contra nemi-
nem qui homo sit, pro peregrino habendum pu-
tant. Neque vero hæc à me ita disputantur, quòd
me patriæ poeniteat. non enim ex Scythia quapiam
natus sum, ciues ornatissimi, quæ tamen ipsa quo-
que suum protulit Anacharsin; non ex Thracia, cu-
ius ex asperis & saxosis locis Orpheus tamen ena-
tus est; non ex immani aliqua & inhospitali barba-
ria, sed ex ea prouincia, quæ cum antiquitus elo-
quentiæ studijs vel maxime floruit, tum hoc tem-
pore, vt vni Italiæ facile cedit, ita ceteris omnibus
facile excellit. Et vero quanto semper homines Gal-
li eloquentiæ studio flagrauerint, vel ex eo intelli-
gi potest, quòd antequam demissa cœlitus sapientia
impijs falsorum numinum cultibus animos homi-
num liberasset, tota Gallia Mercurium eloquentiæ
præsidem deum præcipua obseruantia coluisse per-
hibetur. Quinetiam Herculem non eodem, quo
ceteræ gentes, ornatu nostri colebant, sed innu-
merabilem quandam hominum vim ab eo facie-
bant trahi, catena quadam aurea, quæ è lingua i-
psius ad aures circumfusæ multitudinis pertineret:
cum illud videlicet indicarent, nullam esse rem ad
ducendos quò velis hominum animos dicendi co-
pia

pia potentiozem. Iam quid illud memorem, quod à Strabone proditum nouimus, veteres illos Romanos magnam adolescentum suorum partem; Mafsiliam, quod oppidum in Gallia est, solitos mittere, vt ibi cum morum sanctitatem imbibere, tum honestis artibus instituerentur? Sed & Lugduni annua eloquentiæ certamina celebrari solita poetæ tradunt, & iidem peculiari quodam epitheto facundam Galliam nominarunt. Quid in his immoror? Marcus ipse Tullius, eloquentiæ Romanæ parens ac deus, qui vnus effecit, vt, cum Roma vrbium omnium maxima esset, Romæ tamen Roma ipsa maius esse aliquid diceretur; ille, inquam, M. Tullius, cuius admirabilem dicendi vim ac copiam nemo satis pro dignitate ne admirari quidem potest; à Gallo se homine Plotio eloquentiæ præcepta didicisse profitetur. Idemq; Plotius primus omnium Romæ ludum aperuisse traditur. Quis porro vnquam vel fando audiuit, vllam fuisse bene institutam ciuitatem, in qua peregrini ab erudiendis adolescentibus repellerentur? Quis Quintilianum ex Hispania oriundum fuisse nescit? at is & per viginti annos Romanam iuuentutem publice docuit, & homo Hispanus, consularia Romæ ornamenta sortitus est. Ac ne quis forte nostris hominibus istam summi honoris viam minus patuisse, quàm Hispanis, putet, eundem est honorem

Burdigalensis Aufonius Gratiani principis à se eru-
diti beneficio consecutus. O Atheniensium ciui-
tas, humanitatis parens, bonarum omnium artium
procreatrix. quantum tu à peregrinorum homi-
num odio abfuiſti. tu Apollodoro Cizyceno, tu
Heraclidi Clazomenio, tu aliis peregrinis quam-
plurimis reip. summam ſapenumero credidit. Et
quiſquam reperietur, qui, cum Romanorum, cum
Athenienſium gens omnes in quibus eſſet aliqua
virtus, nunquam non humaniſſime complexa ſit;
Venetorum temp. quæ & hac, & ceteris laudibus
omnes ſuperiorum temporum reſpp. vna ſuperaue-
rit, ſui nunc diſſimilem in ornandis literis eſſe oport-
ere arbitretur? Præclare ille apud optimum poë-
tam fortiſſimus imperator; Hoſtem qui feriet, mi-
hi erit Carthaginienſis, Quiſquis erit. Præclare
vos quoque, patres ampliſſimi, cum ego pro viri-
um modulo ſpecimen ingenij mei iubentibus vo-
bis dediſſem, viſusq; eſſem adhibita diligentia na-
uare aliquid poſſe; quòd peregrinus eſſem, nihilo
me minus iccirco humanitate veſtra complecten-
dum iudicaſtis. Quinetiam vt plus mihi animorum
adderetis, ex eo me loco docere voluiſtis, vbi ho-
mines ita diuino cultui addiſtos, vt cum ſumma in-
tegritate & ſanctimonia vitæ ſummam rerum ma-
ximarum cognitionem ſcientiamq; coniunxerint,
quotidianos induſtriæ meæ teſtes habiturus eſſem.

Vtinam

Vtinam igitur, patres amplissimi, vósque ceteri ci-
ues ornatissimi, vtinam mihi parem aut voluntati
erga vos meæ, aut beneficijs erga me vestris facul-
tatem natura tribuisset. efficerem profecto, vt o-
mnes faterentur, nullum vnquam beneficium post
hominum memoriam melius collocatum fuisse.
nunc illud tantum vobis polliceri habeo, effectu-
rum me, vt à me neque diligentia; neque assidui-
tas; curaturum, vt ne cetera quidem quæ ad hoc
munus obeundum necessaria sunt, magnopere de-
siderentur. Vestrum est, adolescentes nobilissimi,
etiam atque etiam prospicere, ne cum quæ ad ani-
mos vestros omni elegantis doctrinæ cognitione
complendos pertinent, vobis affatim suppetant o-
mnia, tantas opportunitates neglexisse, vobisque
ipsimet defuisse videamini. Cogitate nihil vobis
claritatem patriæ, nihil splendorem generis, nihil
opum ac copiarum affluentiam prodesse posse, nisi
ad hæc omnia studium virtutis, & ingenuarum ar-
tium tractatio accesserit. Nati estis in ea ciuitate,
quæ vna toto orbe terrarum inexhaustum quod-
dam illustrium virorum seminarium existimatur:
à qua cum vnusquisque vestrum tantum ornamen-
ti ac splendoris acceperit: æquum est, vt ad eam
omnes vicissim, pro sua quisque parte, exornan-
dam, studia omnia, cogitationesque vestras diriga-
tis. Plato, quòd Athenis natus esset, gratias dijs
immor-

immortalibus agere solebat : vos quodd Venetijs
nati sitis, est quod vobis non mediocriter gratule-
mini. effecit Plato, vt Atheniensis ciuitas, quodd
eum edidisset, merito vicissim dijs immortalibus
gratias agere posset : vobis quoque faciendum est,
vt hæc præclarsima ciuitas sibi aliquando, quodd
vos in lucem protulerit, grätuletur. Qui è vobis
nobili loco orti sunt, caueant, ne plus accepisse
splendoris à maioribus, quàm ipsi posteris reliquis-
se videantur : quibus non ita clari parentes conti-
gerunt, cogitent nullum esse tam obscurum ge-
nus, quod non virtutis splendore illustrari queat.
Præclare Plato, καλὸς, inquit, θισχυρὸς αἱ τῶν πατέρων
ἀρεταὶ, ἀλλ' ὃν δὲ ἀντιθέσθαι δύνασθαι τὸν τοῦ Σθένης λόγον, ἡμῖν
τα πατέρων μέγ' ἀμείνονες ἐνχομεῖ ἔναι. Pulcher omnino the-
saurus est parentum virtus : sed multo pulchrius
est illud Stheni usurpare posse, Nostra quidem
virtus longe anteferenda paternæ est. Hoc igitur
assidue volutent animo, quibus datum est, vt ad
summam gloriam recto itinere tendentibus, assi-
due liceat pedem in maiorum suorum vestigijs po-
nere. Ceteri cum alios multos sibi proponant, tum
vel in primis Themistoclem, cui nihil generis ob-
scuritas obfuit, quominus Atheniensium ciuitati
summo ornamento fuisse diceretur. Itaque cum
ei quidam maiorum imaginibus tumens, paren-
tum ignobilitatem obijceret, At meorum, inquit,
nobilitas

nobilitas à me initium capiet, tuorum in te desi-
net. Hæc igitur cum animis vestris cogitantes, ar-
ripite alacribus animis oblatam vobis discendi oc-
casionem. Ego quidem hoc, adstante hac clarissi-
morum hominum frequentia, in hoc augusto, &
consecrato ad numen colendum loco, sancte
polliceor, nihil me omnino (quantum
quidem in me erit) prætermis-
sum, quo vestra studia vl-
lo modo adiuuari
posse vide-
antur.

D I X I,

ORATIO TERTIA,
HABITA POSTRIDIE
NON OCTOB. M. D. LV.



PERMVLTOs esse intelligo, qui
de his literis, quæ humanio-
res vocantur, eam animo im-
bibere sententiam, vt earum
tractationem leue quiddam ef-
se, ac nugatdrium existiment:
neque aut magnos admodum
labores ab ijs suscipi, qui eas iuuentuti tradant; aut
eorum magnopere fructuosam esse reip. industri-
am: in eis denique non exquisitam ullam, ac recon-
ditam, sed circumforaneam quandam, haustámq;
de triuijs ac circulis requiri doctrinam putent. à
quibus ego quoniam ita dissentio, vt ex omnibus,
qui se aliquid docere profitentur, horum vel gra-
uissimum munus esse contendam: neque vllos ef-
se, qui aut laborum plus perferant, aut maiores in
rep. pariant fructus: doctrinæ denique à nullo ho-
minum genere maiorem aut copiam requiri, aut
varietatem arbitrer: constitui hodierno die, pa-
tres amplissimi, vósq; ceteri viri ornatissimi, eam
mihi ad dicendum materiam sumere, & nobilissi-
mam studiorum partem, quantum id quidem in
me positum erit, à contemptu, atque ab intolera-
bili

bili ineruditorum hominum insolentia vindicare .
& vero quid aut huic tempori, aut omnino meo mu-
neri facere conuenientius possum; quàm vt, quæ mi-
hi studia celebritatis aliquid cum alijs in locis, tum
hac ipsa in ciuitate pepererunt; à quorum ego ve-
luti fontibus ad hanc quantulamcunque profluxi
hominum famam; ijs quoque vicissim oratione
mea splendoris ac claritatis afferre aliquid coner?
præsertim cum qui hoc literarum genus aspernan-
tur, facere nullo modo possint, quin de vestra,
patres amplissimi, singulari, spectatâq; in omni-
bus rebus, ac pene diuina sapientia non nihil eadem
superbia detrahant. Etenim si hæc tota res tam le-
uis est, quàm isti eam videri volunt: quæ vos tan-
dem causa commouit, vt proximo superiore an-
no, propositis publice libellis, studiosorum homi-
num animos ad nobilem illam ingenij doctrinâq;
contentionem excitaretis; utq; ijs, qui vobis in eo
certamine probati essent, honestissimum postea
præmium ex arario decerneretis? quæ mehercu-
le vna res ad coërcendam istorum temeritatem sa-
tis ponderis habere debebat: vt si hebetiores eos
natura, stolidioresq; finxisset, quàm vt peruidere
harum rerum præstantiam possent; quod tamen
vestro talium virorum iudicio probatum foret, ma-
gnum esse aliquid, ac præclarum suspicarentur.
Sed quoniam cum ijs, qui auctoritate non mouen-

tur, rationibus agendum est: adeste animis; mihiq; breuiter ostendenti, quàm varia, quàmque multiplex eruditio requiratur in ijs, qui literas humaniores docent; eadèmq; opera, quantos ex eorum nauitate atque industria resp. percipiat fructus; non aures modo, sed mentes quoque attentas, quæso, paulisper adhibete. Atque adeo, vt hæc tota controuersia melius dijudicetur, operæpretium est, initio, quænam sit istorum contemptorum humanitatis oratio, cognoscere. qui quoniam eos, qui hæc literas tractant, ad nullum fere maioris momenti negotium adhiberi vident, non ad iudicandas lites, non ad agendas causas, non ad dicendam de rebus grauioribus sententiam: facile in eam opinionem prolabuntur, vt ab eis, præter poëticas quasdam fabulas ad pueriles animos hilarandos compositas, & aliquot leuia comendæ, ac poliendæ orationis præcepta, nihil omnino teneri putent: quid autem magni negotij est, inquiunt, in puerorum confesso de eiusmodi figmentis commemorare, ac modo de Thebano, modo de Troiano bello, modo de Vlyssis, aut Aeneæ erroribus, molli, & ad inanem oblectationem composito sermonis genere dissidere; identidèmq; velut è quibusdam arculis accommodata colorandæ orationi pigmenta deprømere? Ecquæ autem magna eruditio est, scire, quot nauibus Græci ad oppug-

gnandum

gnandum Ilium accesserint ; quot filios habuerit Priamus ; Helenam rapuerit Alexander , ut Homerus , an Helenæ simulacrum , vt Euripides prodidit ? quod emolumentum ex istorum omnium scientia ; quod detrimentum ex ignoratione percipi potest ? Nam ceterarum quidem artium professores quantum utilitatis afferant , perfacile est ad intelligendum . siue enim dialecticos spectes ; ab ijs certa quædam veri falsiq; in rebus omnibus cognoscendi ratio traditur : ij se , quid cuique consentaneum sit , quid repugnans , quid ex quoque efficiatur ; quæ sit diuidendi , quæ finiendi , quæ argumentandi ratio , & tenere , & alios docere præ se ferunt . quid physici ? qui rerum principia , causasq; tractant ; qui , quomodo quidque gignatur , quôq; modo intereat , edisserunt ; qui nimborum , fulminum , tempestatumq; causas ; qui corporum cœlestium magnitudines , interualla , cursus , progressiones , institutiones ; qui animi naturam , qui rationem sensuum , qui animantium omnium ortus , victus , figuras ; qui stirpium , qui omnium ferme rerum , quæ gignuntur è terra , naturas ita persequuntur , nulla vt pars ab eis cœlo , mari , terra , vt poëtæ loquuntur , prætermisâ sit ; hæc cum tractant , mediocritérne reip. profunt ? Nam si ad eos te conuertas , qui eam susceperunt philosophiæ partem , in qua de rebus expetendis fugiendisq; dis-

ritur ; ij vero sunt , quorum industriæ nulla vn-
quam poterunt præmia satis ampla reperiri : qui-
bus enim , dij immortales , quàmq; præclaris in re-
bus eorum disputationes consumi videmus ? qui
hoc primum docent , qui sit finis , quid extremum ,
quid vltimum bonorum omnium ; quem velut ad-
scopum omnes actiones , omnes cogitationes , o-
mnia consilia referri oporteat : quot sint virtutum ,
quótq; vitiorum genera ; quibúsq; modis illas af-
sequi , ab his declinare possimus : quomodo exul-
tanti , iactantiq; se , & detrectanti rationis impe-
rium , frænos iniicere oporteat cupiditati : tum quo
modo quisque se in re familiari gubernanda gere-
re debeat : postremo , quo nihil pulchrius , nihil
præclarius , nihil denique diuinius ne votis quidem
conceptis optari potest , quibus moribus , institu-
tis , legibus temperandæ sint ciuitates : quibus illæ
modis fundari atque institui ; quibus augeri , atque
amplificari , quibus denique copiosissimæ , locu-
pletissimæ , vno verbo , beatissimæ effici possint .
o res præclaras , dij immortales , & ardentissimo stu-
dio , summâq; corporis atque animi contentione
dignissimas . o vitæ philosophia gubernatrix , o vir-
tutum omnium parens , vitiorum omnium expul-
trix . tuum est falsarum opinionum temeritatem di-
ripere : tuum est omnem inanitatem & errorem am-
putare , ac circuncidere : tuum est vitiorum fibras
euellere ,

euellere, stirpes elidere, semina extinguere. merito diuinus Plato nihil te præstantius hominum generi à dijs immortalibus dari potuisse dicebat. eant nunc isti verborum magistri, fabularum interpretes, nugarum architecti: perfricent frontem, si quam habent, & se vlla ex parte cum philosophiæ doctoribus conferendos esse prædicent. qui si aliquod forte paulo abstrusius loquendi genus, aut aliquam vocolam non ita peruulgatam, aut quampiam paulo reconditiorem fabulam reperire potuerunt, dignos se inaurata statua putant. nonnunquam etiam de eiusmodi tricis ita inter se digladiantur, vt pro aris & focis certamen suscepisse videantur. hæc fere est, patres amplissimi, eorum, qui studia laborésq; nostros deprimere conantur, oratio: qui quòd philosophiam laudant, libentibus id nobis, atque approbantibus faciunt: nunquam enim cuiquam concedemus, vt eam plus amet, plurisve faciat: quòd autem nullum censent studijs atque artibus nostris cum ea esse commercium; in eo quantopere fallantur, facile ex ijs, quæ dicturus sum, intelligetur. Nam primum omnium, si hoc ipsis concederemus, nihil aliud à nobis, quàm poëticas fabulas, & exornandæ orationis præcepta tradi: non ex eo tamen efficeretur, quod isti volunt, inanem quandam, & ludicram nostram omnem esse doctrinam, neque aliò, quàm ad puerorum

rorum animos vana quādam oblectatione demul-
cendos, referri. Etenim poetarum fabulæ, quas
isti tantopere exagitant, & insectantur, non leuia
quādam, & frugis expertia ociosorum hominum
commenta sunt: immo vero sub eis, velut inuolu-
cris, atque integumentis, omnis doctrina elegans,
omnis ingenuo homine digna cognitio, omnis de-
nique sapientia continetur. Eratosthenem quen-
dam fuisse aiunt, qui poeticen ita contemneret, vt
Homerum ineptæ loquacitatis magistrum nomi-
naret. at hercule Plato, at Aristoteles, quorum
non paulo maior est, quàm nescio cuius Eratosthe-
nis, auctoritas, ita sæpe repetitis ex eo testimonijs
vtuntur ad confirmanda ea, quæ tradunt, vt eum
non tantum studiosissime legisse, sed vix vnquam
de manibus deposuisse videantur. Itaque mirari so-
leo, cum quidam, qui se philosophos uideri cu-
piunt, & quidem eiusmodi philosophos, vt, velut
Atlante cælum, ita philosophiam supercilio suo
niti putent, ita despiciatui ducunt poetas, vt eo-
rum scripta aspicere se dignari negent. qui quidem
eiusmodi philosophi sint, ipsi viderint; cum eos
contemnant, quos philosophorum coryphæus Pla-
to modo sapientiæ patres ac duces, modo deorum
interpretes, modo deorum filios vocat. Aristote-
les autem, cuius isti se germanos esse interpretes
gloriantur, non tantum, vt ante dixi, in omnibus

scriptis suis identidem poetarum testimoniis vti-
tur, verum etiam libro primo de sapientia, philo-
sophum omnem, fabularum amatorem esse con-
firmat. quod igitur Aristoteleos esse se aiunt; for-
te verius, sine dubio quidem verisimilius dicerent,
si se ab Epicuro esse affirmarent: hunc enim ex o-
mni memoria vnum fuisse philosophum accepi-
mus, qui cum omnem elegantiam doctrinæ, tum
poetarum præcipue scripta contemneret. quòd
quidem se, negligendis poetis, ex Aristotelis disci-
plina ac familia censerì volunt; in eo, meo quidem
iudicio, faciunt & impudenter, & imperite. At enim
id mihi hoc tempore propositum non est, vt de
poetarum laude dicam: quod si esset; facile osten-
derem, omnia præcepta vitæ, omnia virtutum of-
ficia nihilo ab eis deterius, quàm à philosophis i-
psis, doceri. non igitur, cum poetarum libros in-
terpretamur, inanibus fabellis, nutricum more,
animos ducimus; sed sementim quandam virtutis
atque doctrinæ facimus: non in leuibus, minimè-
que frugiferis rebus operam sumimus; sed præ-
cepta sapientiæ, quo facilius in animos influant,
insatiabili quadam admirabilium rerum varietate
condimus. quid, cum ornate ac copiose loquen-
di præcepta tradimus, ludere videmur, an ea do-
cere, quæ semper principem locum in omni bene
instituta ciuitate tenuerunt? an nescimus, eloquen-
tiam

tiam à grauissimis auctoribus rerum omnium regnam vocari? hæc enim est illa virtus, quæ quamlibet in partem arbitrato suo flectit audientium animos, eosque pulchritudinis suæ splendore obstupefactos, quibusdam velut habenis numerosæ orationis regit. hæc illa est, quæ consolatur mœrentes, afflictos excitat, iacentes erigit: quæ sceleratis exitio est; innocentibus præsidio: improbis terrore; probis ornamento. hac Cicero fretus Catilina furores, & nefarie in patriam inita consilia dissipauit: hac togatus superauit armatos: vt vel inimicorum confessione omnibus triumphis maiorem adeptus lauream diceretur. hac instructi qui sunt, maius omnibus tyrannis imperium in homines obtinent. siquidem tyranni possunt illi quidem corpora constringere; animis nullam adhibere vim possunt: hi vero dominantur in animis: quæque ipsis honesta atque vtilia videntur, ea non facere modo alios, sed etiam velle cogunt: illi inuitis imperant; hi volentibus: illi & oderunt omnes, & odiosi sunt omnibus; hos in omne hominum genus beneficos, perpetua omnium beneuolentia comitatur. neque vero non qui eloquentiam contemnere se simulant, illius præstantiam intelligunt: sed quod assequi non queunt, inuidiose vituperare malunt, quàm ingenuè de imbecillitate suarum virium confiteri. Orationis igitur meæ summa eò

redit

redit denique : etiam si nihil aliud à nobis requi-
reretur , quàm vt explicaremus poetarum fabulas ,
& iuventuti quasi vias , quibus ad dicendi faculta-
tem peruenire posset , indicaremus : tamen neque
mediocriter reip. prodesse nos , neque paruis in rep-
bus contemnendisq; uersari . Nunc tantum abest ;
vt ea solum requirantur à nobis ; vt nulla sit ars di-
gna hominis liberaliter educati studio , cuius non
aliqua cognitione oporteat tinctum esse eum , qui
munus hoc cum laude sustinere meditetur . itaque
hoc inter nos & alios interest , quod alij eos tractant
scriptores , quorum vno aliquo de genere tota di-
sputatio est . non enim fere in libris dialecticorum ,
physicorumve , aut in ijs quibus medicina , iurisve
ciuilis scientia continetur , quicquid reperias , cu-
ius intelligentiam non ex illis ipsis , de quibus in-
scripti sunt , artibus repetere possis : at nobis ij quo-
tidie sunt explicandi libri , qui cum scripti sint à vi-
ris omni scientia excultis ; ipsi quoque innumera-
biles locos ex omni disciplinarum genere deprom-
ptos habent . itaque ceteri etiam si eam vnam ar-
tem teneant , quam docent , aliarum omnium sint
omnino rudes : tamen sufficere posse suo muneri
existimantur : neque vnquam aut medico turpe
habutum est , nescire leges ; aut iurisperito vel me-
dicinam , vel astrorum scientiam non tenere . nos
vni sumus , quibus onipis illa liberalium artium va-

rietas non pertractanda quidem; ac pernoscenda
penitus; sed degustanda tamen, & delibanda ne-
cessario est. non longe abierimus. superiore anno
Ciceronis orationes in Verrem interpretati sumus.
quàm multa ibi nos explicare meminerunt, qui
tum aderant, in quibus alios propemodum omnes
iuris ciuilis ignoratio fefellerat? libros eiusdem de
finibus nunc ipsum interpretandos suscipimus.
quàm multa nobis ex omnibus philosophiæ parti-
bus depromenda erunt, quibus ignoratis, hos quo-
que libros ignorari necesse est? quid astrorum ra-
tio? quid terrarum situs? nisi qui hæc vtraque vt-
cunque teneat, satisne se quisquam idoneum poe-
tarum interpretem profiteri potest? & tamen vs-
que eo alienis laboribus iniqui homines reperien-
tur, qui ludere nos, ac iocari; & nihil in docendo
aliud, quàm puerilem voluptatem, aucupari pu-
tent? nam illud quoque minime prætermittendū
est, quòd à grauiorum artium doctoribus neque
ornata, neque elegans, neque, multis quidem in
locis, latina oratio postulatur. Itaque ruant licet in
dicendo, & impure, improprie, barbare loquantur;
suo id eis quodam iure licere creditur. at nobis di-
centibus, sunt, qui quosdam quasi laqueos tendant;
vt si quid exciderit parū expolitum, diem nobis con-
tinuo, dicant violatæ latinitalis. quòdque postremæ
iniquitatis est, peccare nos putant, nisi in ijs etiam,

quæ

quæ subito fundimus, plurimi illigati sint & verbo-
rum & sententiarum lepores. quæ cum ita sint, quis
est, qui non intelligat, si hominû expectationi huius
professionis satisfacere cupiamus, infinitos esse no-
bis labores exhauriendos? desinant igitur, desinant
isti alienæ industriæ contemptores, gloriæ obtre-
ctatores: comprimant uocem stultitiæ atque inui-
dentiæ indicem. Vos vero, patres amplissimi, per-
gite, ut facitis, benignitate vestra labores nostros
fouere: ut hæc florentissima, & bonarum artium
studijs deditissima iuuentus, exercitationi-

bus hisce nostris ad virtutem præpara-
ta atque præculta, vestram olim
in hac felicissima rep. gu-
bernanda sapientiam
facilius imitari
queat.

D I X I.



